

清容居士集

附札記

五





清容居士集

附札記

(五)

袁桶撰

清容居士集卷第十三

絕句 七言

團扇圖

玉樹秋殘翠影疎。掩門何處望金輿。昭陽殿裏渾閒事。最恨當年李婕妤。

擊梧圖

萬樹梨園已失春。秋聲颯颯起胡塵。君王獨立梧桐下。不見當年鎖諫人。

韓幹五王出游圖

花萼樓高怯翠衾。平明聯騎走芳林。讓皇可是無忠益。一曲涼州恨最深。

夜讀唐將遺事二首

合江雨暗裂珠旗。鼙鼓寥寥怒促圍。不是帝鄉車上去。元戎那得袞衣歸。
雉尾雲深漢殿開。將軍鐵馬響春雷。太平未覩匆匆去。空憶君王白玉杯。

秋山圖

簇簇麻姑十二闌。倚空搖落總塵寰。臥遊京洛誰消得。一榻松風響珮環。

童時侍先人泊京口。旅樓一月正對江山。樓繁麗特甚。江津流民散處不可悉數。今皆不復有。追憶

舊事因成絕句十首

碧瓦參差第一樓。風旗獵獵喚行舟。兵廚有酒真堪飲。不學弓刀也白頭。
紅袖娟娟舞旋齊。鑾江一曲唱尤奇。西湖院落曾翻得。未識君王知不知。
燈火闌珊月色低。少年乘醉馬東西。樓頭畫角聲悲壯。又聽歌聲促曉雞。
白草蕭疎野火焚。流民草舍各星分。沙田土瘦新耕得。甘死江頭不作軍。
朱門高插相風旗。千里船行總得知。稻米流脂江上去。健軍何處是男兒。
日日樓頭算酒錢。峨冠太守號籌邊。鳴騶傳入丹陽館。爲是行都過客船。
淮馬低如果下騶。春風小隊打紅毬。日斜臺上人爭看。銀盃分明第一籌。
明月曾愁多景樓。幅巾長袖是清流。金焦山勢元相望。不揜諸公富貴羞。
硯山園下將軍宅。脫卻兜鍪強學儒。聞說高堂擁紅粉。醉翻筆陣墨模糊。
白雲一去愁千疊。此地重來百不如。空憶當年覓梨棗。小樓燈火了殘書。
劉改之舊有山掩諸公富貴羞之句。在人課子最嚴時。在族樓不廢講誦。

雪中招虞伯生祝丹陽

空林一色十分春。羞殺高眠獨笑人。喚取東坊虞博士。紅爐同點奪胎銀。
金芽初熟白皚皚。袖手爐邊未盡開。爲請招真老高士。且須騎馬抱琴來。

千頃芙蕖送我船。碧香紅影弄娟娟。梁山風景能消得，不到西湖卻十年。

支家口

蕩底天鵝雜榜聲。南鄉今有幾長亭。錢湖未盡滄洲興，臥看荷花十二汀。

黃河

乘槎使者問河源。織女相逢事惘然。從此競傳天上去，不知滄海幾桑田。

耿山

一簇山腰總賣薪。語音猶是舊吳人。江湖水闊從今住，更肯輕生學買臣。

古黃河口

溫溫河水似湯泉。送我南歸意萬千。入海定從天上去，不知重會是何年。

黃樓

詩到徐州不用題。危濤千尺壓金堤。羣峯翠盡蘇仙去，萬古黃流日又西。

伏日度淮

伏日陰陰盪棹船。詩腸冰雪碧淮鮮。黃塵自是人間暑，不識薰風在五絃。

過高郵

一片歸雲一片帆。芰荷深處綠蒲灣。鳩鵲可是無情思，不及沙鷗自在閒。

甓社湖

甓社湖中新水清。風牽荇帶引帆行。靈妃夜度霓裳冷。輕折菱花翫月明。
聞見

飛蝗眼見度淮鄉。又聽吳田水渺茫。總怨春來雪五尺。變風變雨變年荒。
渡揚子江

一舸中泠煙雨飄。片帆閃閃浪招招。倚闌僧在半空語。南去北來今幾潮。
俞光遠治余別墅口占奉謝

種竹澆花俟我還。花成雲塢竹成山。相逢且說相思恨。更說何時得共閒。
周子敬三年不寄一書口占奉寄

伏日松陰酒一壺。抱琴身與鶴身癯。故人天外慵傳信。唯憶楞伽是舊書。
聞仲正新得掌珠道中奉寄

知君已厭添丁事。與我同看納甲書。別後匡床清夢少。春來又獲掌中珠。
懷應德茂

瘦石支筇偈仄吟。吳山雲冷越雲深。江湖老盡誰知己。獨聽寒泉響玉琴。
明皇醉歸圖

日暮毬場醉欲歸。停鞭更進紫霞杯。老髯未省霖鈴曲。猶願君王款款回。

過故人墓

湖曲深深鎖墓田。種松成本起蒼煙。欲窮精爽周流處。雲在青山月在天。

送昌上人

江南山水一枝藤。更上雲中第五層。昨夜西風傳雁信。露華如雪月如冰。方袍圓帽眼如鶩。問訊紅衣不點頭。剛道西天同佛住。箜篌琴瑟勝南州。

題葛仙翁移居圖

翁媪相攜入翠微。轉頭猶有可憐兒。丹砂不是神仙藥。勾漏歸來鬢已絲。

黃松瀑索酒

殘春聽雨元無著。恰似槽床淺滴聲。活水飛花誰駐得。願隨小榼夜深傾。

祝丹陽飲馬圖

天馬從來不受塵。水清深愛自由身。髯奴未識相忘處。手控青絲強屈伸。

舊春花下與東嘉周子敬聯詩。有人到中年始憶家之句。余坐舟中五十日。因憶此詩。作俳諧體奉寄。

平生愛詩復愛酒。晚歲畏名兼畏茶。年過五十不歸去。底用中年始憶家。

四明衣冠山水窟。人道風流勝永嘉。爾來愁絕各閉戶。方信中年始憶家。我眠船中五十日。飯有飛塵餐有沙。古言墨頭須萬里。底用中年始憶家。春風一架爛金沙。憶昨同醉遺烏紗。山東禁酒不得飲。方信中年始憶家。

題鄭潛昭玉堂藁

雲漢天孫古錦機。秋風槎上解相期。迴鸞舞鳳曾翻得。不用人間五色絲。春睡牽人渴思濃。小窗誰贈密雲龍。自憐舌本那知許。急寫絨題似舊封。

宮娥弈棋圖

爭先春色在眉端。圍坐佳人著意看。可是相憐饒不得。東風自怯五更寒。

求酒

爲愛雲房酒盞清。涓涓殘溜滴春聲。夜來梅月十分白。嗅盡梅花看月明。輕輕梅花春風面。卻似道人微醉時。只恐花飛失君意。更酌叵羅歌小詞。小詞歌徹飲叵羅。一寸清霏奈客何。窗外馬蹄猶不住。誰道江南春水多。我家舊釀碧琉璃。色壓花枝朵朵低。頗怪春深未歸去。花下杜鵑應亂啼。

伯生約賦竹枝詞因再用韻

君家竹葉江水清。我家竹枝三峽聲。三峽水隨江上去。迴首望鄉終眼明。

簇簇青帘蕩子期。飄飄紅杏三月時。青帘紅杏總輕薄。自展碧牋書我詞。
暮雲纖纖如越羅。勸子不去知子何。桃花水深放船了。卻憶關山塵土多。
愛君酒滑滑如泥。白眼叉手頭愈低。南鄰琵琶不堪聽。自舞柘枝驚春啼。

舟中得功遠瓊花露戲成三絕

瓊花瑞露十分清。客裏相看眼倍明。自是江南春色好。錯教騎馬到京城。
平生嗜酒不殢飲。最憶停盃微醉時。花下盈盈似相待。莫教春倒最濃枝。
繁禧觀裏花如雪。留取清陰待我來。應有真真花底坐。生香一曲舞三臺。

梁山灤

梁山水灤八百里。容得碧鷗千萬羣。愧我扁舟數歸路。晚風掠陣入蒼雲。
嫩草豐茸間軟蒲。一川晴綠映春蕪。平岡散牧分雲錦。簇簇斜陽是畫圖。
大船曬網小船罾。知是吳儂喚得鷹。共說五湖難住卻。朔風吹雨捲千塍。

仲章以余賦瓊花露因成陽臺之句次韻

月下看花花氣清。羨君不飲更分明。五雲破曉迴歸馬。疑上天邊碧玉城。
我愛瓊花賦酒詩。雪香憔悴可憐時。平山芍藥開如斗。擬揀肥紅作贈枝。
相如肺渴非關酒。多病卻迴江上來。可是春風消不得。白頭吟憶舊琴臺。

送危功遠

翩翩海燕近宮城。的天鵝度上京。癡坐江南未歸客。夜聽春樹哀潮聲。
居庸關外雪模糊。簇騎分明似畫圖。猶有深春後歸雁。見君曾宿洞庭湖。
天柱峯前第一詞。風清月冷鶴先知。京城可是無吟思。眼看飛花下筆遲。

送吳成季五絕

牆東杏樹花千片。片片隨風到馬頭。只恐花飛不解走。度關時節暮雲羞。
北雪初消未見山。馱鈴聲雜佩珊珊。廉家池館春風好。獨看牡丹惟我閒。
上京新酒玉津津。薄醉深春惱殺人。截取當年釣竿竹。捲筒相寄不嫌頻。
詩瓢浙瀝風前樹。雪在深村月在梅。從此不須生感慨。晚寒更上望鄉臺。
鼇峯路與仙峯近。取次詩筒日往來。慙愧阿戎松下坐。洞門深鎖碧桃開。
長沙鄧醫年七十餘。遊京師。二兒扶小車。得酒卽醉。類有道者。劉充之號曰壽軒。且令賦詩。
大兒椎髻小兒丫。拍手清天在小車。剛道人間易榮辱。醉歸齊插碧桃花。
南極星明湘水邊。七還猶是小行年。囊中紫粉誰傳得。酒盡君歸我亦眠。
醉面頰如紫玉盤。天風吹上月團團。擬翻新譜朝元引。雪壓梅花鐵笛寒。

平原賈氏戲綵堂

鶴髮棱棱水石村。飛花蛺蝶舞兒孫。人間朱紫爭新取。落日微茫政倚門。
晚訪仲章不遇

小院春濃落照閒。碧篁相對乳禽還。晚風陣歇游絲盡。留得歸雲在屋山。

梅溪圖

玉人楚楚意逍遙。隔水攜琴不受招。迴首芳林真嫵媚。春風歌館聽吹簫。

三徑圖

遶舍山青流水新。春風吹玉綠勻勻。意行已復支筇去。從此何須問主人。

靜芳亭

簾外羣山當畫屏。白雲如水度中庭。松花落徑無人掃。失卻莓苔一半青。

貯香亭

長安何處認飛花。片片相隨十萬家。唯有碧桃天外種。露華清淺玉交加。

大年宿雁圖

寒夜沙汀睡已成。雁奴翹首獨深驚。朝陵閒說燕王事。恨殺人間兄弟情。

次韻馬伯庸應奉絕句一十八首

玄都觀裏桃花句。沈香亭前芍藥詞。今年春風似憐我。明年春風更相思。

肥紅盈盈錦步障。淺黃深深綠油幕。絕憐舊嫁小娉婷。一曲生香淚雙落。
垂髻雙雙白馬郎。看花不語愁晝長。堂前有婦不肯守。遍愛吳姬與趙倡。
綠柳高低千萬樹。翠竹橫斜三兩家。妾非江南蕩子婦。不許郎君烏帽斜。
五臺山前雪如席。千古萬古搖銀光。驅馬莫飲澗邊水。澗水能令馬穿腸。
小樓昨夜聽琵琶。推手卻手怨王家。不辭遠嫁盧龍道。可憐長城骨如沙。
海南不愁珠翠少。家家共籠秦吉了。夜聽吉了似秦聲。賈客年年不知老。
紅衣夜唱娑羅樹。云是西天好兒孫。吹螺日飲官法酒。笑渠騎馬傍人門。
吳兒蕩漾楚兒癡。酒酣垂手索題詩。桃葉不傳渡江曲。竹枝空歌三峽詞。
老鶴攀松舞月色。哀猿坐樹啼天光。一喜一悲盡今古。慷慨不如秦舞陽。
誰家弄玉矜少年。採蓮艇子歌娟娟。轉首那知顏色老。猶抹橫雲啼鏡前。
京華作客不知老。燈花明滅搖寒房。爲問涉江下滌滙。何如種竹滿篋簪。
金門羽客恣狡獪。清曉玄文總不看。朝騎白馬穿閬苑。夜乘白鶴下天壇。
妾顏不比天桃枝。妾心不如傾日葵。羞著主衣當筵舞。蓬鬢荆釵卻自宜。
燕山芍藥大如斗。千朵萬朵凝春煙。健羨南京馬供奉。醉著宮袍不上船。
向曾六月桓州住。雪歇前巖散冰樹。王郎馬郎太愁生。兩騎雙雙辭我去。

吳門艇子淮南船。我慣乘之眼欲穿。老來愛酒不得飲。歸向桃源種秫田。
烏靴窄窄稱宮袍。雙鬢風翻見二毛。聞道中山止十驛。急須乘馬釀松醪。

還馬伯庸文藁

乘槎深夜問支機。天女流梭舞鳳飛。迴首人間金粟尺。翦燈愁製五銖衣。

逸馬圖

瑤池宴罷周王老。牛首蛇身騁怪靈。漢使近從西極返。龍媒元是世間形。

試馬圖

二駿翩翩勢竝驅。轉頭槽櫪總庸奴。秋風萬里雲容與。不用青絲強繫拘。

散馬圖

秋盡川原草樹空。冷雲嗚咽似呼風。太平天子囊弓矢。留得閒身落照中。

次韻繼學伯庸上都見寄

陰陰棧殿水雲蒼。鵲鵲風微夏日長。渾似醴泉宮畔境。千官齊立從文皇。
紗縠單衣珮水蒼。碧牋裁詔繭絲長。日斜雙入通明殿。雲母屏前對玉皇。
相思盡日鬢毛蒼。赤土塵深怨路長。忽憶鏡湖明月夜。藕花清淺棹餘皇。

題危功遠山水

雲作模糊冰作棧。玉峯深鎖鐵峻嶒。欲問先天觀前路。釣叟捲篷終不響。
孔節婦表門

鳳逐麒麟天上飛。深鍾涼月獨鳴機。春風猶是人間世。華表亭亭護落暉。

墨梅圖

鐵石冰霜百世身。疎明瘦直一生真。玄雲借我淩寒便。直上鈞天試早春。
雪繭輕蒙絕點塵。小窗晴日得橫陳。夢回猶記溪橋路。黯澹相看喜似人。

蜀女繡牛圖

絕壁連雲翠木稠。五丁空作蜀王羞。浣花女子聞鵲苦。繡作春風萬古愁。

錢舜舉折枝菊

醉別南山十五秋。雁聲深恨夕陽樓。寒香似寫歸來夢。背立西風替蝶愁。

子昂控馬圖

雪積流沙冰歇巖。天池飛舞入殺函。奚官可是相拘檢。笑領春風白玉銜。

渡水羅漢圖

洞口泉分岸渺茫。意行的的水中央。相看總絕神通想。不用折蘆歸故鄉。

次韻繼學天寶宮禱雨見懷

小著羅衫涼似秋。梨花寒重雪交流。瓊林宴罷傳宣急。不許祠官用虎頭。
的的雲團白玉杯。可堪羊角兩驂開。松花深處塵如雪。知是龍歸鶴未來。
千林紅紫鬪京城。一朵姚黃露有聲。惆悵可人何處覓。獨行花下到天明。
新雨悠揚人未歸。遠山凝碧綴雲衣。捲簾擬作庭前舞。點點團沙柳絮飛。

送嶼上人

玉几前峯慘翠顏。瘦藤挑雪度三關。黃塵似作松花落。歸雁南來我北還。
東南蕭寺梵王音。禪榻蛛絲薜荔深。我欲與君同面壁。首拚雙屣挂松林。
東溪老子詩三略。的的瑛盤貯夜光。擬把玉簫松頂坐。穿雲吹徹九天涼。
月暎寒燈雪暎簷。故鄉夢斷酒初忺。因思舊宅梅霖後。新竹齊抽碧玉尖。

寄天童岫長老

太白山高雪四圍。孤峯翠織五銖衣。誰言老子寒無力。獨擁紅爐更下幃。

贈南嶽道士歐陽君

丹鼎芙蓉生玉床。紫泥封固結玄霜。道人急歸巖屋守。不使月明騰夜光。

崔白竹

昔年家住篋簾谷。葉葉淩雲對此同。近日畫師爭斂手。垂頭疑在柳陰中。

往歲南歸。商隱長老遠惠佳句。不獲承貺。次韻敘懷。

席帽京塵廿載強。風前數髮白於霜。芸編不檢蛛絲罥。斑馬專門萬古香。
桑乾嶺上是天心。萬樹松花積翠深。兩度灤陽三伏節。片雲飛雪是晴陰。
烏紗承笠霏霏土。短袖持鞭窄窄風。冬盡不知梅藥白。春來深愧杏花紅。
商隱長老以余歸。喜溢翰墨。愧歎之餘。次韻以謝。

少年學道惡加鞭。掩息支頤絕語言。玉几老禪曾對坐。茶甌如雪閉寮門。
沈沈雲頂絕天風。不展袈裟萬念同。眼見永師傳妙密。虎丘殘塔夕陽中。
龍歸石落無消息。碧眼長身振祖傳。江上白鷗元不礙。潮回月出滿樓前。
春日奉旨侍祠太乙朝罷。觀齋中紅梅花。

藏春塢裏功夫密。一一羣英點絳唇。共道紫皇分上瑞。須知太乙露天眞。
斗柄分明指孟陬。紅鑪橫蒺化工收。先皇寶曆今重建。應許南枝在上頭。

次韻砥平石

廿載冰霜興已終。復於馬上送年窮。雙峯閣上憑欄立。疑有子規啼晚風。
燕山長驛四十五。雪擁金臺玉作層。疑是黃蠶消不得。何年投老得依僧。
我翁綠野舊精廬。樓閣連雲畫不如。贏得高人欹枕臥。膽瓶冰蘂樂冬餘。

恩師高住湖邊寺。清夏菱花閱錦波。妙趣通玄鄰粲可。清言協律近陰何。砥師平地湧金仙。不詫虛空不說禪。怪我往來增白髮。雲龍新碾汲清泉。

省庵

三

三十六宮春寂寂。月華如水碧雲真。空齋宴坐天心轉。知是羲皇太古人。

姚子中左司墨竹

雪花搖曳被春欺。的的琅玕侍玉墀。千歲玄霜誰拾得。紫薇花畔寫參差。

斗巖

搖光遊戲下塵寰。曾被山僧駐不還。從此夜深隨鶴度。玉衣清淺珮珊珊。

歸德王瓊母表閭

寶奩香瑣綉羅衣。不許春來蛺蝶飛。得見慈烏好顏色。門前槐柳引雛歸。

西寧李處士碑

元復初作

堂堂吏部睢陽敍。耿耿中郎有道碑。點檢清河金石錄。的於處士絕諛辭。

博平王獻妻徐氏表閭

無子無夫鬢影蓬。兩家王母事相同。王逢原妻。宋史有傳。臨川妙筆傳青史。我輩空令兩耳紅。

離宮圖